

MI LUCHA

na aruba
m'a nace
i mi cuero a keinta
ora sanger furioso
a keinté cu bida

mi lombrishi ta derá
na aruba
i pa mi esey ta:
un historia
un cuenta
pa mi conta mi jioenan
un lucha pa mi hoga 'den

nan di cu e isla
ta un perla
cu lama ta adoré
te hasta suté den su skochi sensual
i t'esey ta aruba?
un birgen cu un amante bruto?

esey ta aruba
un romance
un lucha pa mi hoga 'den

i mi ke pa un dia un mainta
lo mi muri cu su solo riba mi frenta
i su rosea den mi cabez....
i no papia mi
di un perla
ni di un baranca
ni di su solo sofocante
ni di su paisaje
tristo i desolá
pero haci mi loko cu amor
pa mi inspira mi lucha
te cu morto ranka mi fei otro
i tira mi pa biento
papia mi di mi lucha.....

Federico Oduber

